



Anwar mahu usaha promosi barang Malaysia dipertingkatkan

Oleh Mohd Iskandar Ibrahim - Disember 14, 2023 @ 6:05pm

bhnews@bh.com.my

PUTRAJAYA: Datuk Seri Anwar Ibrahim mahu usaha mempromosikan barang Malaysia dipertingkatkan lagi bukan sahaja di peringkat tempatan, malah antarabangsa dalam memacu pertumbuhan ekonomi negara.

Perdana Menteri berkata, beliau sendiri memainkan peranan mempromosikan barang tempatan ketika berkunjung atau mengadakan lawatan kerja di luar negara.

"Batik Malaysia umpamanya, esok petang saya akan ke Tokyo, (Jepun sempena Ulang Tahun Ke-50 Persahabatan dan Kerjasama ASEAN-Jepun), semua 10 kepala negara ASEAN diundang kerajaan dan Perdana Menteri Jepun.

"Ada satu malam dia kata boleh pakai kot, tali leher atau pakaian rasmi, jadi saya bagi nota, saya nak pakai batik Malaysia sebabnya saya rasa bertanggungjawab untuk promosi barang buatan Malaysia dan saya akan rasa bangga dan beritahu bahawa ini adalah batik Malaysia, mutunya baik, rekaannya baik," katanya berucap pada Majlis Perasmian Karnival Barang Malaysia, hari ini.

Yang turut hadir, Menteri Perdagangan Dalam Negeri dan Kos Sara Hidup (KPDN), Datuk Armizan Mohd Ali serta timbalannya, Fuziah Salleh.

Anwar berkata, selain membantu mempromosikan barang Malaysia di luar negara, beliau turut mendukung produk tempatan menerusi kunjungan ke gerai dan warung pada setiap minggu sebelum menunaikan solat Jumaat.

"Kalau ada kesedaran kita untuk mendukung, bantu, saya tak terasa kurang darjah saya atau turun darjah saya kerana makan di gerai dan warung setiap minggu.

"Malah kopi dan makanan dihidang di warung kadang-kadang lebih enak daripada restoran lima bintang dan lebih murah, yang pentingnya tempatan," katanya.

Justeru, beliau berharap semua menteri, timbalan menteri serta ketua setiausaha (KSU) menunjukkan kesungguhan dalam mempromosi dan mendukung barang Malaysia.

Selain itu, beliau mengingatkan pengusaha barang Malaysia untuk terus meningkatkan lagi mutu produk mereka supaya dapat bersaing dengan syarikat asing.

Malah, Perdana Menteri menasihatkan golongan muda supaya tidak mudah terpengaruh dan terpukau dengan propaganda iklan produk luar negara yang akhirnya membebankan ekonomi sendiri.

"Kalau membeli, beli barang mewah, pendapatan RM2,000, baju RM400, ini kalau ikut teori ekonomi, maknanya asakan iklan yang begitu kencang dan hebat, lagi besar syarikat, lagi kaya jaringan syarikat antarabangsa, lagi kuat pengaruh dia.

"Maknanya dia terpaksa membeli walaupun tidak mampu, terpaksa menunjuk hebat mengikut trend walaupun membebangkan ekonomi sendiri," katanya.

Mengulas mengenai Karnival Barang Malaysia, Perdana Menteri menjelaskan bahawa ia amat membantu memperkasakan pertumbuhan ekonomi negara.

"Kempen beli barang Malaysia, harganya sederhana ketimbang harga (produk) import dan ia membantu menjana pertumbuhan ekonomi," katanya.